

588977

欽定剿平三省邪匪方略

正編

二
用
二
一

卷之四

四

五

六

七

八

九

十

十一

十二

欽定剿平三省邪匪方略各正編卷二百八十八

辛酉年

十二月初一日

癸卯

長麟奏言

臣

因探聞苟逆偷

過嘉陵江竄入甘境之梅子園

臣

卽馳回甘省

照料一切二十三日行抵徽縣地方途次據探

役報稱十七日賊匪仍在梅子園屯聚提督慶

成趕至與賊接仗殲斃生擒約一百餘名賊匪

敗走十八日竄至階州屬之安家壩十九日竄

至階州屬之望則關二十日竄至階州屬之牛

頭寺二十一日竄至階州屬之草川子係階州

禮縣交界慶成現在帶兵截剿副將齊郎阿亦

由陝省南山趕回緊躡追剿頃接慶成來信稱

十七日黎明趕至梅子園賊匪二三千人分爲

兩股正在起竄慶成督率將弁兵勇直前剿殺

斃賊四五十人賊匪插旗聚集戰手佔據陡險

山梁將弁兵勇奮力搶撲賊匪滾石如雨兵勇
多被石傷並不稍退攻撲愈力賊匪又分兩股

欲抄兵勇後路慶成卽撥弁兵迎擊又殺賊七

八十人生擒四十九名賊匪敗走訊據活賊張

大禮等供稱此股係苟文明爲首冉高張魏餘

匪及川陝邊界湊合打散零星戰手並新裹者
共有三千餘人等語至提督七十五因恐賊匪

由階平竄往龍安現由太平川一帶顧住西路
探蹤進剿總兵永明亦經慶成催令迅由陝省
棧道一帶帶兵趕來協同剿辦慶成因連日追

賊緊急囑臣先行奏

聞早慰

聖懷再甘省灾黎均已各登堡寨現在飛催前調
兵分撥衛護斷不致在聽賊匪裹脅蹂躪其各

路官兵所需糧餉亦經臣多差標弁分投嚴催

務俾源源運供不敢稍有貽誤適又接據道員

朱勲稟稱經畧額勒登保已於二十三日馳抵

南鄭縣屬之牟家壩差探苟逆賊匪奔竄情形

賊匪如向東竄即由棧道一帶迎頭截剿如向

西竄即由寧羌沔縣一帶進兵日內可入甘境

奏入

上命軍機大臣傳諭額勒登保長麟慶成曰苟逆股

匪前經慶成長麟奏約有二千餘人竄入階州彼

時卽慮該匪竄至甘省沿途裹脅賊數又必加增

今據長麟奏稱苟逆渡江後連日在階州之牛頭

寺草川子等處蠢竄人數已有三千餘幸慶成帶

兵趕至與賊接仗該逆又分兩路欲抄兵勇之後

經慶成撥兵迎擊先後殲擒一百七十八人賊匪

始行敗走慶成當苟逆乘間狂奔之時趕緊截擊
以挫賊鋒甚屬可嘉慶成前於安南出兵時曾賞
給巴圖魯名號嗣經革除今慶成一聞苟逆西竄
之信卽帶兵趕上賊匪恃險抗拒滾石如雨慶成
督率兵勇並不稍退殲斃多名俾逆賊不致肆行
竄擾卽係慶成之功著加恩賞還西郎阿巴圖魯
名號以示獎勵俟苟逆辦竣再加懋賞昨額勒登

保在南江發摺時自尙未知苟逆竄甘之信今已
行抵南鄭自係接到地方稟報卽行馳赴該處慶
成現在所帶俱係防兵日久坐守於打仗不能十
分得力額勒登保所帶之兵均屬節次得勝勁旅
旣抵南鄭應卽探明賊蹤迅速趕上督同慶成奮
力截擊勿再延緩至長麟摺內並未提及德楞泰
來甘自因川境南江現有苟逆分股之賊及湯劉

李彬等匪亦尙未淨正須德楞泰在彼督剿其竄
甘苟逆正股有額勒登保慶成足資剿辦卽責成
伊二人趕緊辦理並催永明等速由棧道前來協
剿務將苟逆股匪卽在該處地方全行辦竣則此
外已無大股賊匪倘萬不得已亦須逼賊回川斷
不可令其竄過棧東或潛匿南山老林辦理又致
費手至七十五辦賊遲誤節經降旨令額勒登保

等將伊革職拿問今七十五並未跟蹤緊躡轉繞
赴太平一帶是否有心逗遛必須核實辦理著額
勒登保詳查如七十五本已行走遲緩聞賊匪入
甘又繞道避賊其罪更無可追自應仍遵前旨革
職拿問倘西路實在緊要必須預行攔截七十五
前赴該處尚非無因亦著據實具奏朕於七十五
本無成心未嘗有意從嚴亦非曲爲開脫額勒登

保務當秉公查辦以昭平允再甘境所需軍餉業

經長麟派員分段催償自應妥爲供運前據長麟

奏該省現有存備展賑銀三十八萬餘兩此時距

明年展賑之期尙遠軍儲緊要必須隨時接濟長

麟卽可將此項銀兩先行挪移支放用過若干卽

據實數奏明候朕撥給還款若賊已兜截回川無

須甘省支應卽可不必挪動也

初四日丙午勒保奏言竊臣前與德楞泰會合迎

晤額勒登保籌議大局惟時探聞七十五追剿

苟文明一股賊匪已至廣元一帶賊夥較眾恐

七十五一時不能得手額勒登保德楞泰遂會

商帶兵向廣元巴州分路取道併力剿辦臣仍

回川東督剿各股餘匪十八日回抵太平該縣

尚有前次薛大烈生擒蕭焜股內夥賊六十餘

犯監禁候審臣當卽提犯審辦並差探川東各

路賊蹤資冲阿温春等追剿劉潮選股匪已由

開縣向寶塔一帶跟蹤緊躡格布舍揚芳等跟

剿李彬股匪在東鄉大坪溪地方得有勝仗現

向雞鳴寺一帶緊躡前進薛大烈剿辦湯思蛟

股匪尙在城口一帶旋於二十二日接據稟報

該鎮自辦完蕭焜股匪之後仍行探剿湯逆兵

到茨竹溝據土人報稱附近牛尾池小中河等處山內有賊匪一股約三四百人薛大烈恐湯逆即在其內查詢路逕知茨竹溝對面大山之後有花角園堡子坪譚家灣江西壩四條小路相通均在青林之中薛大烈遂連夜分撥兵勇派令叅將羅聲臯蕭鳳來遊擊晉之連都司周俸等由花角園取道遊擊傅廷佐桂涵都司馬成

林陶得伏等由堡子坪取道遊擊胡定邦都司

薛陞馬正元等由江西壩取道薛大烈同副都

統銜協領達斯呼爾岱副總管格亨得爾副將

張績遊擊張振辰等帶領滿漢官兵由譚家灣

取道四路遠近不一均約定行近賊屯埋伏候

至黎明一齊圍捕及至天明賊匪猝見官兵四

至驚慌亂竄我兵奮力衝殺刀矛並舉立斃賊

八九十名生擒賊六十四名餘匪或奔跳崖坎
或鑽匿林箐我兵分投搜捕又殺斃六七十人
生擒九十八名尚有匪衆百餘人奔上該處之

邀仙崖擲石抗拒我兵勢難仰攻薛大烈遂挑
選趨捷兵勇二百名暗伏兩旁樹林將大隊兵
勇徐徐撤退賊見我兵下撤果卽乘空下山逃
竄我兵從樹林內突出悉數殲擒並無一名漏

網查訊此起賊匪係黃號齊王氏股內餘孽賊

首葛士寬王朝安均係襄陽老教掌櫃向同姚

馨佐一路今年秋間在巴山老林內被官兵剿

散潛匿川陝邊界近日復與高家營及辛聰股

內剿散餘匪零星湊合要想出山掠食今遇官

兵圍住殲淨所擒活賊二百三十六名盡屬戰

手薛大烈就近訊明正法惟將黃號賊首葛士

寬王朝安並僞總兵王學書辛聰之姪辛世才
齊家營探馬頭郝思順黃號步探王啟秀牌頭
洪正舉等共七犯解候查訊此時城口一帶尙
有零星賊匪數股倏出倏沒不知湯思蛟一犯
究竟潛匿何股現在趕緊剿辦等情查近日賊
匪情形疊被官兵剿捕殘匪零星窮竄一聞官
兵消息卽分路奔逃賊數愈少探信愈難所以

官兵屢次痛剿而首逆尙未就擒今旣據報城
口尙有零匪數股但能逐股辦淨首逆不患不
得卽輾轉竄逸而餘黨旣淨亦無虞一二首逆

稽誅臣現在飛飭薛大烈速將城口附近山內

各股零匪趕緊剿辦卽湯逆就擒餘股亦必須逐

一殲盡設無湯逆在內而殲除一股卽少一股

餘孽亦於大局有益又臣前聞有零賊一股從

東鄉竄往達州風碓子一帶當派遊擊唐際盛
夏雲龍分兵一千名前往剿捕行抵該境探聞
此股餘匪已竄入大竹地方該遊擊等卽帶兵
從黃泥壩觀音崖一路探蹤前進初二日探得
賊匪屯聚團馬舖該遊擊等領兵趕剿賊匪一
見官兵卽慌亂狂奔我兵奮力追殺斃賊三十
餘名生擒男婦胡連升李蔡氏等二十一名口

搶獲騾馬十二頭匹鎗矛數十件查訊此股賊

匪係王珊餘黨宋總兵爲首帶有賊匪約二千

餘人已折向新開坪一路奔竄該遊擊等卽將

所獲男婦交大竹縣審辦仍帶兵勇連日跟蹤

緊躡初六日追至觀音橋地方趕上賊匪該匪

見官兵逼近卽搶占山梁遊擊夏雲龍守備夏

瑚周士貴等從山後掩襲下壓遊擊唐際盛都

司王泰守備吳之繡張鼎甲等帶兵從觀音橋
進擊賊見官兵兩路齊至卽亡命衝突我兵奮
勇圍捕斃賊五十餘名生擒男婦一百十八名

口當於賊屍內認出偽總兵宋國品牌頭孫大
砲屍身二軀活賊內訊出牌頭游學明王應才
鄭相李貴方繼太鄧維均朱神志蒲明得等八

名立卽正法其餘男婦送交新寧縣審訊辦理

此路打仗有千總高占魁把總袁進希各受矛

傷現飭調治陣亡兵丁一名受傷兵勇五名該

遊擊等辦理完竣卽帶兵探迎臣一路歸隊臣

查此起零匪爲數雖屬無多但已竄入腹地該

遊擊等帶兵剿淨尚爲出力惟近據探報雲陽

萬縣一帶另有張姓零匪三四百人在彼滋擾

無兵剿辦該處與新寧梁山一帶接壤皆距達

州相近

臣

現又撥本隊兵勇添入唐際盛夏雲

龍等一路並派總兵張志林統率就近由達州
取道馳往剿辦此時川東零星分股賊匪有賽
冲阿溫春格布舍楊芳薛大烈張志林等帶兵

分路跟剿而額勒登保德楞泰及七十五各路
官兵又俱在川北一應糧餉軍火等項均須籌
備分投接濟且叅革副將褚大榮叅將周廷翰

之案在達州羈候日久亦須早爲審結臣擬於
此次路過達州時暫駐三四日將各路糧餉軍
火及應審辦案件親爲料理完竣卽趕赴東路
督剿奏入

上命軍機大臣傳諭勒保曰此次賽冲阿温春格布
舍楊芳蔭大烈等分剿李彬湯劉等股沿途俱有
斬獲並將黃號餘孽葛士寬等首夥數百人全行

賊盡所辦尚好但苟文明一股早據慶成長麟先
後奏到該逆與冉高姚等匪會合於十一月十二
日偷渡嘉陵江竄至階州梅子園等處相近禮縣
交界經慶成趕上迎擊已挫賊鋒而額勒登保已
於前月二十三日馳抵南鄭探蹤進剿勒保係四
川總督乃於苟逆股匪偷渡過江尚茫然不知所
司何事且與經畧叅贊會晤後爲日無幾何以額

勒登保二十三日已至南鄭進剿苟逆而該督是

日所發奏摺如無其事該處地方官於苟逆偷渡

情形諒無不稟知本省總督之理豈勒保佯爲不

知遂能始終隱匿耶勒保著傳旨申飭其賊匪偷

渡之金獅廟大灘一帶江岸若該督並未派員弁

在彼防守任賊竄越則罪在勒保若本派有員弁

不能守禦勒保卽當查明叅奏毋得稍有瞻徇至

摺內稱有零星股匪但能逐股辦淨首逆不患不得等語所見甚是此時川省並無大股賊匪其零星竄賊殲除一股卽少一股餘孽若能先將李彬湯劉等逆擒獲固屬甚善否則將零星賊匪愈剿愈少各首逆勢孤更無難按名擒縛該督總當遇賊卽剿不拘何股迅速殄平肅清川境如將李彬湯劉等著名首逆殲擒卽用六百里加緊奏聞以

慰厯念其餘剿盡一股零星賊匪仍用六百里馳
奏所有此次剿賊出力之遊擊唐際盛夏雲龍如
再有奮勉之處著該督保奏再行加恩

初五日丁未額勒登保奏言竊臣昨因荷逆股匪

由廣元闌入寧羌一帶與德楞泰分路剿辦德

楞泰帶兵由南江廣元前進臣卽率同扎克

爾楊遇春由沙壩碑壩前進於東西兩路探剿

姚章等股潰敗零匪並偵探苟逆竄蹤相機策
應二十三日馳抵通江之西河口接到陸有仁
來信苟逆賊匪由廣元之大灘涉淺過河竄向

階州境內

臣

查此股賊匪係七十五帶兵專辦

匪未能痛加截剿致向西奔慶成在羅家壩得
信雖已由陽平關前往兜擊第恐該匪人數較
多亡命狂奔慶成或恐急切未能得手一有蔓

延所關匪細上遂卽派令楊遇春帶領馬步兵

勇二千餘名由南鄭沔畧僱程進發併力剿辦

次日臣及扎克塔爾等帶領官兵由青石關南

鄭接續而進二十六日趕抵褒城之新集途次

又接陸有仁來信云七十五由太平川躡蹤追

剿十五日於安東河趕上賊尾畧有擒獲慶成

山陽平關過河十七日趕到梅子園遇賊接仗

斬獲百餘人賊匪向西北逃竄有趨崖門口白

馬關之勢

臣

又飭令楊遇春探蹤而進倘該逆

折竄東來即可迎頭截殺現又飛飭慶成七十

五上緊截剿務即將該匪攔回不得深入階文

地界並飭知楊遇春等探蹤追進如該匪被剿

東折且可與慶成七十五等共收夾擊之效

臣

現卽於新集暫爲駐扎設或該匪窺伺棧道

臣

更可率同扎克塔爾就近截剿該匪前此竄擾

南廣一帶密箐深山剿捕頗形棘手今既於此

一帶奔竄則地勢較南廣易於爲力楊遇春慶

成七十五所帶官兵已不下萬人茲

臣

又復於

新集親臨督催三路官兵趕緊剿辦無難就地

撲滅不致稍有蔓延再查川省之嘉陵江係衆

流所匯其由西固階州文縣而來者爲白水又

爲白龍江其由成縣徽縣畧陽而來者爲白水
江二水至廣元以下合流始名嘉陵江過白水

江西去係通階文之路南去則係白龍江過白

龍江南岸始與龍安交界此次苟逆股匪由寧

廣接壤之大灘晒淺竄過係白水江乃嘉陵江

上游距龍安邊境尙遠且有白龍江之隔現在

總兵呂朝龍帶兵在彼防範 總兵田朝貴帶兵

復由廣元前往堵剿該一路實可無虞

臣

並已

知會德楞泰卽於南廣一帶督辦該處零匪可
無須兼顧甘境之賊再前此由寧羌竄入陝境
零匪二百餘人經慶溥雒昂等疊次剿捕之後
餘匪三四十人竄向洋縣山內茲據慶溥等報
稱該匪遁至孝義鎮安界內慶溥雒昂率領兵
勇探蹤搜捕署寧陝鎮韓自昌亦分派兵勇追

剿斬獲三十五名又經孝義寨勇孟雲從等拏

獲賊匪十七名業將該零匪搜捕淨盡臣現今

慶溥帶兵轉回仍於寧羌一帶督率防範

額勒登保又奏言竊查兵丁追剿賊匪備極艱

辛其衣履等項必須因時籌備臣於九月間在

陝境督剿時因天氣漸寒所有各路堵截官兵

衣履等項除陝甘二省距本營甚近長麟等業

經飭辦軍裝解營應用外其餘東三省滿兵及

各省漢兵鄉勇亟須就近代爲籌辦

臣

會飭西

安漢中興安道府等製辦棉襖一萬一千六百

五十件棉馬褂一千一百件暖帽四千八百九

十五頂棉套褲四千八百七十九雙布鞋四千

九百二十四雙均經各該處陸續辦就解送軍

營分散各兵勇以資服用共計工料銀二萬二

千一百五十兩臣因兵丁等隨征出力歷有歲

時不日事竣凱旋衣履銀兩臣原擬自行捐給

奏請於應得廉俸內照扣歸欵撫臣陸有仁以

伊歲入較優必欲捐辦臣查陸有仁與藩司溫

承惠夏間會已捐辦單衣鞋履此次需費較多

恐亦力難獨任臣曾經札復茲陸有仁又與各

司道籌定通省自直隸州以上公捐陸有仁捐

銀四千兩藩司溫承惠捐銀三千兩臬司文需
捐銀二千兩道員朱勲台斐音素納吳沂楊護
等五員各捐銀一千兩知府陳文駿龍萬育盛
淳崇王駿猷洪蕙趙洵樊士鋒等七員各捐銀
八百兩直隸州知州陳初莊振莊忻皂杜喻文
鏘等五員各捐銀五百兩皆係實缺之員各自
捐廉將價值照數給發並未敢於公項中稍有

擲動再臣抵川境時又經勒保處解到捐廉

製辦棉衣三千件布鞋二千雙臣亦經分散各

兵勇添補穿着現在各兵勇等均得禦寒無虞

風雪因知

皇上軫念戎行無時或釋理合奏

同均奏入

上命軍機大臣傳諭額勒登保曰苟文明一股在廣

元地方踰淺渡江係前月十二日之事慶成長麟
等均已先後奏到而額勒登保前次摺內尙云苟
逆股匪由廣元闖入寧羌彼時額勒登保得信已
遲現在額勒登保派令楊遇春帶兵由南鄭沔畧
探蹤前進并飛飭慶成等上緊截剿將該匪攔回
期收夾擊之效自應如此辦理惟額勒登保現在
褒城之新集地方暫駐自係慮及該匪窺伺棧道

是以在彼駐劄就近截剿但苟逆一股自渡江之
後沿途裹脅日多昨據長麟奏到該逆竄近禮縣
已有三千餘人雖經慶成趕上得有勝仗然兵力
未免稍單額勒登保旣至褒城自應統兵前進旣
可爲慶成楊遇春兩路聲援而於苟逆奔竄蹤跡
得信亦可迅速至苟逆奔竄甘境總由七十五剿
辦不力所致額勒登保摺內旣稱七十五未能痛

加剽殺又稱七十五於安樂河趕上賊尾畧有擒
殺是七十五逗遛玩悞之處額勒登保皆所深悉
卽因未曾接奉前此將七十五革職拿問之旨未
經具摺嚴叅亦應將伊延緩踈蹤之罪叅奏請旨
何得竟無一字提及且七十五在川專剽苟逆種
種逗遛額勒登保並不上緊督催致苟逆得以乘
間偷渡亦難辭咎此次應一併自請議處而摺內

亦並未奏及均屬非是額勒登保著傳旨申飭仍著遵照前旨查明七十五如並未與賊接仗任意遷延卽當將七十五革職拿問審擬具奏不可姑息或另有別項情節以致延緩亦應嚴叅請旨總之七十五縱賊之罪難以輕貸卽此時苟逆一股尅期辦竣七十五亦有應得罪名至額勒登保果能將苟逆股匪就地撲滅俾首夥全數剿淨不再

蔓延則功過尙可相抵額勒登保惟當勉之又勉
一面嚴飭楊遇春慶成等奮勇截擊仍親自帶兵
探蹤前進上緊督催卽在甘境剿淨竄跡音速
至至階文一帶地勢寬廣賊匪最易肆竄從前高
三馬五等逆闌入甘省時額勒登保等曾稱該處
地勢較平無深林密箐可以施展馬力而該逆等
旋卽輾轉奔竄擾害無數地方迨日久始行撲滅

何曾在甘省辦完一股今摺內尙稱甘省地勢較
南廣易於爲力寧不赧顏額勒登保尤當以前事
爲戒總須西顧龍安東顧棧道遏其旁竄之路將
該匪迅速殲除方足仰承恩眷日內楊遇春慶成
續有勝仗卽速行馳奏以慰廑注再樊人傑一犯
是否卽在苟逆股內或另竄他處何以並未提及
仍著查明具奏

上諭內閣曰額勒登保奏陸有仁等捐廉備辦衣履
解送軍營分散兵勇一摺軍營兵勇跟隨剿賊備
極艱辛其衣履等項自應隨時籌備以資賞給陸
有仁等若將此項衣履早爲陳奏朕必准其作正
開銷不令捐廉籌辦今旣於通省直隸州以上實
缺各員內公捐置備均屬急公可嘉巡撫陸有仁
藩司溫承惠臬司文需道員朱勳台斐音素納吳

沂楊護知府陳文駿龍萬育盛惇崇王駿猷洪蕙
趙洵樊士鋒直隸州知州陳祁莊振莊忻皂柱喻
文鎰均著交部議敘該撫等既自請捐廉仰邀恩
敘斷不可因此稍有派累致干嚴議此時功屆垂
成一切軍營賞項俱可無庸再行置備若實有需
用之處該撫惟當奏聞請旨動支公項不得派令
地方官公同捐辦

同日陸有仁奏言竊臣前將東竄餘匪剿辦殆

盡嗣復接據探報逃散零匪共有三十餘人分

爲數起晝伏夜行總向林深箐密之處潛竄逃

命慶溥韓自昌雒昂等各路兵勇緊躡入林搜

緝於秦嶺北河小香爐溝等處林內隨地殲洗

先後共三十五人業已搜捕淨盡臣恐尙有一

二逃賊潛匿稽誅現復飛咨該署鎮韓自昌加

意偵緝並飭各地方官督率寨勇到處搜尋務期盡絕根株所有慶溥兵勇自即可撤回寧沔一帶分布嚴防其雜昂所管鄉勇亦令整隊出山以便派赴沿邊堵剿連日探得經畧額勒登保於川陝交界一帶屢獲勝仗殲斃餘匪甚多惟因苟文明股匪二千餘人由廣元竄至甘省

階州雖經慶成於梅子園一帶截剿稍有斬獲

七十五亦自西路縈躡而來但賊數較多且有

各股剽剩戰手竄台萬一乘間東趨入棧則剿

辦又復需時

臣

隨星飛咨呈經畧已先派楊遇

春由棧道自東而西隨探隨造以便與慶成兩

路夾擊經畧大營亦卽由沔縣一帶居中策應

叅贊德楞泰由西鄉移至廣元探蹤前進督臣

長麟於本月十八日自漢中起程馳回甘省防

堵諒此殘敗餘氛不難卽時殄滅一經剗盡其
餘零匪自更易於殲除大功指日告蕝糧餉更

關緊要

臣

隨時隨地設法供支幸未稍有缺悞

惟餉銀一項前缺後空粵餉二十萬兩於本月

初旬到陝

臣

因應還甘省賑餉雖係預備明春

加展之需而事關撫恤災黎未便人爲延宕業

已照數解還甘省至前蒙

賞撥淮餉銀三十萬兩據報本月初旬始行起程約
須臘月中旬方可趕到又本月二十二日欽奉

諭旨賞撥淮餉二十萬兩以十萬兩解送經畧軍營

備賞其餘十萬兩交臣收用現在尙未據報起

解日期均屬緩難濟急在各路征兵衝寒敵愾

月餉既不能稍有拖延卽防守兵勇分例係計

日授食之需亦難歷久不發臣復與長麟酌商

將山東省解甘壬戌年例餉銀二十萬兩暫爲
截留始得酌發十月中旬以前各營緊要之款
而自十月下旬以至歲底卽酌分緩急竭力拮
据亦必須銀五六十萬兩方可稍資敷衍至於
善後等費臨時自當奏明另行籌辦奏入

上命軍機大臣傳諭陸有仁曰此次慶溥韓自昌雒
昂等將零匪搜盡所辦尙好至探聞苟文明股匪

及各股剽剽戰手竄合恐其乘間東趨入棧所慮
極是現在楊遇春已帶兵勇二千自東而西與慶
成兩路夾擊而額勒登保亦已至褒城一帶現諭
令探蹤前進諒苟逆一股當可就地殄除不致擾
及棧東至所稱陝省糧餉緊要現將山東解甘壬
戌年例餉截留二十萬兩給發此項例餉自應籌
撥還甘現已傳諭兩淮鹽政將商捐銀兩動撥二

十萬解交甘省歸欵矣

以奉國儲蓄四十萬兩命交其後俄國自取

文辭東至視歷刻符屬國無幾時俄自東取什

令將俄前數萬俄銀十萬兩西海船送俄不廷

如前俄文舉而歸俄國送俄銀自是俄銀不帶

俄銀而歸俄國送俄銀自是俄銀不帶

俄銀而歸俄國送俄銀自是俄銀不帶

欽定剿平三省邪匪方略正編卷二百八十九

辛酉年

十二月初九日

辛亥

德楞泰奏言竊

臣

帶兵前由

南江向西南探賊進剿二十五日行抵木門場

接據防江副將趙得功等稟報初八日探得蒼

溪縣屬之永寧舖白鶴觀喬子壩等處均有賊

衆距嘉陵江岸二三十里有窺伺之勢卽會同

川北道李鎡蒼溪縣王衍慶等帶領兵勇於堰

溪口亭子口小站河一帶督兵巡防賊匪屯聚
山梁屢次直撲河岸竟有馬賊跣至江心者均
經擊斃未得搶越嗣賊又沿江而上恐其狡計
折回乘間踰過李鎡等酌留兵勇在小站河防
堵趙得功帶領兵勇與賊隔河並上賊遂翻山
四散直至二十一日亥刻賊匪突至堰溪口搬
取竹木紮筏搶渡經兵勇極力堵禦轟擊半夜

始行退走轟斃賊匪四名馬騾二匹旋探該匪

竄向五里子一帶仍走江岸不遠趙得功李鏞

現在雙游子大壩口分投扼據惟江岸綿長兵

力單弱臣卽批飭該將道等鎮靜小心防範是

日臣卽趕至甌子壩三更後拔營行程一百四

十餘里二十六日申刻抵盤龍場探得該匪已

在大元山汪家河茶園子等處焚掠臣恐賊匪

知覺狂奔將營盤紮於山坳不准各營燒放號

火是夜四鼓帶兵冒雪進剿令達勒精阿馬瑜

帶同侍衛法依當阿克什布總管富登阿副總

管珠山副將李應貴馬應國叅將馬濟張應貴

遊擊涂陞由校槽口梅子灘一路進剿臣督同

色爾滾侍衛蘇爾伸總管蘇卿阿協領德寧阿

副將達自祥叅將何君佐遊擊馬文斌德英額

李應元由柏楊院陳家壩一路進剿以期左右
夾擊黎明時均趕抵賊屯處所時該匪已經起
竄馬步兵勇分投極力趕追直至木橋子追上
賊衆我兵奮勇剿殺立斃賊匪五六十名生擒
魯學貴等一百二十一名敗殘餘匪復分兩路
奔逃隨令達勒精阿馬瑜等帶領兵勇由柳溪
溝一帶追剿臣督同色爾滾等由三合場老土

地趕殺兩路官兵均又追至騾子槽地方該處
溝深路窄賊衆擁擠不開我兵衝入賊羣刀矛
齊舉又殺賊七八十名生擒侯德峻等九十三
名奪獲馬騾八十七匹頭旗幟刀矛無算賊衆

滾崖跌斃者不計其數

臣

復督率馬步兵勇竭

力趕剿六十餘里至鍋莊坪唐家溝一帶各殺
賊三四十名生擒周得友等五十三名其沿途

逃散者無從悉數惟達勒精阿趕殺賊匪因山

高陡險冰雪滑溜人馬滾跌下坎數丈幸有石

塊擋住壓傷左膝幸不甚重仍忍痛換馬帶兵

追賊兵勇內亦有陣亡及受傷者數名另行咨

部辦理旋訊獲犯侯德峻供稱係嘉慶二年被

擄入營充當戰手在陝西湖廣甘肅四川地方

各處打仗殺人元帥張添倫見我出力封爲先

鋒從前原有四五千人近被官兵追殺實只剩
四百餘人又有楊開甲手下總兵陳國柱亦帶

三百餘人前至南江合營在山內各處黑夜摸

樁又擄有三百餘人那時會見了苟文明仝他

商量分開牽綴官兵苟文明往廣元一路我等

於初間走到蒼溪不能過江又商量要走廣元

尋找苟文明不想官兵追趕將我等擒獲等語

周得友所供亦同隨將該二犯臠割處死其屈

得宇等一百十四名均係日久戰手老賊一概

正法訊出蒼溪難民曹有富李張氏等一百三

十六名口卽就近寄存三會寨酌留口糧交寨

長張林暫爲照料並札飭該縣王衍慶親赴該

寨查明住址妥爲安撫其廣元難民王登仁王

董氏等十四名口該縣葉文馥業已來營卽交

伊領回查臣前奏有苟逆分出小股六七百人

竄入龍山一帶者現經臣訊據獲犯卽係張添

倫與陳國柱合夥黨匪除此次剿洗外張逆約

剩男婦老幼不過三百餘人已由通坪三家壩

鐸尖山向南江奔竄有走野人村之勢陳國柱

率殘賊百餘名由旺蒼壩漢王城亦向南江逃

遁臣統計全局張陳二逆餘孽無幾卽使竄逃

山內諒不爲患而入甘賊匪較爲緊要總兵田朝貴現在帶兵二千餘員名在廣元山內搜剿零匪此刻業已無賊且距臣軍營不過數十里

臣卽札調該總兵令其卽帶原兵剿辦張添倫等殘匪務期竭力剪除淨盡不可任意遲緩臣

卽帶兵就近馳赴廣元確探苟逆情形相機辦理倘附近再有竄來零匪仍可隨時搜捕不但

可顧白水江岸亦可扼據川北再勒保帶兵折
回太平後聞薛大烈所追湯思蛟股賊賽冲阿

温春等所追劉潮選餘匪均屬無幾現又竄入

大寧山內臣相離日遠尙未得其來信日來或

已掃擒亦未可定又遊擊唐際盛所追賊匪數

百近亦由開縣遁入老山惟據雲陽縣稟報有

張姓賊夥六七百人在彼游奕無兵剿辦臣現

亦札知賽冲阿温春等如劉逆已除卽就近移

師雲陽剿辦張姓股賊並暫在川東一帶幫同

勒保逐一搜捕剿洗

臣

營中尙有馬步兵勇二

千餘員名無論何股賊匪足數剿辦囑其不必

急欲回營再

臣

遵奉

諭旨遵查現在三省各股賊匪除苟逆一股二千餘

人外其餘如湯思蛟劉潮選李彬姚馨佐辛聰

張添倫唐明萬會芝秀王國賢等餘孽每起百
餘人至五六百人不等實已敗殘狼狽自知滅
亡在即悉藉老山箐林爲苟延殘喘之計若無
官兵搜剿則合夥結黨出而擄掠一聞官兵臨
近又復四散分逃晝伏夜出如鬼如蜮分合出
沒靡常且川陝楚邊界內外尙有零星散匪自
二三十人至百餘人不等至樊人傑臣一犯前

月行至太平據報該逆只剩數百人遁匿於湖
北邊界老山之內是否已被官兵及寨勇擒獲
之處刻下尙未據有稟報該逆惡貫滿盈天理
不容自不能倖逃法網惟此時賊蹤潛藏山內

地方遼濶

臣

近又移師川北各州縣稟報遞送

愈遠實在數目未能周知然論目下情形除苟

逆外實無成股賊衆

臣

約畧計算統共亦不過

六七千人較之上次查覆一萬三千之數又減
一半俟查明後再行詳細覆奏

德楞泰又奏言查現在川楚陝各股賊匪均係

敗殘零星分竄惟苟文明一股人數尙多

臣前

在川東時因苟逆由陝折回川之太平高頭壩
羊耳壩游奕其時提督七十五並無專辦之賊

臣遂於十月初二日奏明將苟逆賊股專交七

十五帶兵剿辦毋論竄向何處務宜窮其所向

嗣復疊次咨催臣與經畧額勒登保行次南江

貴門關又據報苟逆分出六七百人向西南龍

山一帶奔竄正股二千餘人向西闌入寧廣界

內又經額勒登保與臣嚴行催飭臣等商酌分

兵搜捕各起零匪又可以備苟逆折回或爲迎

剿或爲夾擊臣卽取道由木門西進二十五日

接據防江副將趙得功等稟報蒼溪屬嘉陵江
 岸一帶**有賊匪窺伺業已會同川北道李鋈等**
督率兵勇屢經轟擊尙未遠颺現經分投扼據
日夜嚴防臣**正移營前進接據廣元縣知縣葉**
文馥稟報有賊匪一股由會家河竄近朝天關
大路梗阻十二日已至鍾子鋪直奔沙溪子河
岸是夜大霧三更時分作四五起一面與防河

兵勇搶渡打仗一面分出賊衆由橫梁子大灘

孟蘭閣菜白灘青灘廟延長六七十里蜂擁踴

淺兵勇衆寡不敵已被搶渡過河十三日有七

提督帶兵趕追十四日在寧羌安樂河趕上賊

尾稍有斬獲並稱陝西慶提督亦帶兵由陽平

關前往截剿查此河在廣元之東距縣一百三

十餘里係嘉陵江上游之支河各畧陽河其中

尚隔有黑河一道若該逆欲過川西必須經由
白水渡江方能奔竄是防堵白水實爲緊要

臣

當卽飛飭總兵許文謨知府汪福將原兵帶赴
白水卡隘督同原防白水之叅將沈宗文嚴密

防堵並飛飭松潘鎮總兵呂朝龍將備戰兵八

百名調赴碧口一帶令該鎮協同許文謨等併
力堵截諒可無虞查甘省階文一帶今歲秋收

歉薄現在賑卹又值冬令嚴寒冰雪交加之候
該逆不但無可掠食亦難忍受饑寒揆度情形
斷不能久延滋蔓又查苟文明等合夥賊匪不
過二千餘人而慶成七十五兩路大兵現有萬
餘兵力數倍於賊且慶成之兵現抵階州之清
水係在賊之北七十五之兵現在階州之琵琶
寺係在賊之西臣業已飛咨該提督等務宜併

力將苟逆等賊股就地殲除否則亦當逼向東

南此時額勒登保已由南江而至沔縣臣亦示

日可抵廣元均可以收兩面夾擊之效設或該

逆有竄白水之勢臣卽帶兵由昭化過河乾近

直前迎剿惟甘省久經肅清百姓皆已復業四

此次苟逆等復竄該處閭閻未免又受荼毒臣

實在惶悚焦急之至再查七十五專剿苟逆賊

股迄今將及兩月屢經行催總未能痛剿一次

前臣同勒保經過太平縣時詢知該提督追賊

至皮河舖苟逆屯於水田相距不過七八十里

七十五因兵勇未曾支餉十六日回至縣城耽

延六日於二十二日始行帶兵前進迨追至南

江四河壩接仗亦未得手該逆遂西竄廣元所

屬之沙溪子一帶跣淺搶渡所有防河不力之

文武俟臣抵廣元查明另行叅奏外其提督七

十五素日打仗雖屬勇往當此功屆垂成之際

並不竭力趕緊剿辦致苟逆又復竄甘未免稍

需時日七十五玩悞之咎實無可辭惟臣與七

十七同在京營當差現又同事川省臣雖膺叅

贊重任然將軍提督均爲大員是以未敢定擬

然又不敢稍事迴護瞻徇再臣適接據駐劄廣

元之副將永寧知府德福等稟報苟文明賊股
已被慶提督七提督由甘省截回於十一月二
十八日午後自寧羗燕子河折竄河東七提督
緊躡賊蹤二十九日該逆已奔至廣元之鍾子
舖等情查苟逆折回川境仰賴

天威所致誠爲歲事預兆臣不勝欣忭之至至鍾子

舖在廣元縣北距城二百餘里臣於初一日拜

摺後趕至黃土坡在縣之東亦相距鍾子舖二
百餘里初二日卽取道天仙坪曾家河前進該
逆若由原路折竄正可與七十五兩面夾擊一
鼓集事如或另竄他路臣督同七十五等併力
掃除冀以仰紓

聖厘此次七十五將苟逆賊股迅速截回未令滋蔓
甘省亦未遭其蹂躪該提督深知愧憤極爲奮

勉可否仰邀

格外鴻慈出自

皇上天恩

同日長麟奏言查苟文明賊匪據報由草川子

直趨西田文縣一帶意欲竄往龍安經提督七

十五遶至賊前迎堵慶成緊躡抄截將該匪截

回於二十三日折竄階州屬之琵琶寺七十五

由安樂河王家山一帶趕至與賊接仗賊匪奔
逃迅速未能得手僅殺賊匪數人二十四日賊
匪竄至階州屬之太平川慶成七十五與總兵
永明等四路兜截賊匪無路可走於二十八日
夜間竄至階州交界偷渡白水江有防守陽平
關遊擊徐延齡帶兵在江岸拏卡堵截黑夜兵
單身中矛傷陣亡慶成卽於二十九日遶過陽

平關迎剿該匪卽由大灘地方竄入四川廣元
縣境向南奔竄慶成七十五現在緊躡追蹤甘
省境內已就肅清此次各路大兵入甘爲日無
幾甘省雖當災歉各州縣撥運軍火兵糧經

臣

嚴催督飭尙屬迅速寬餘均無貽悞現在人心
莫定安堵如常其前竄陝省南山內之零星賊
匪數十人亦經副都統慶溥督率各將弁全數

剿滅淨盡並無一名漏網至臣前調官兵二千

二百名現在秦州岷州鞏昌一帶防堵雖賊匪

現已出境自應卽行檄撤惟臣接閱額勒登保

德楞泰等議奏戡定大局搜捕餘匪章程內開

卽日大局戡定後請於川陝楚三省境內各設

大營三處搜捕餘匪並議令各道府率同委員

勸諭寨民一體協同搜捕等因查甘省界連川

陝倘有零星賊匪竄入藏匿亦不可無兵搜捕

臣現調之官兵二千二百名內河州鎮標官兵

六百名該處回番雜處地方緊要現已札飭撤

回本汛以重巡防外其餘官兵一千六百名卽

交鞏秦階道朱爾漢階州遊擊七十九管領於

階州連界來往巡查遇有零星賊匪卽行搜捕

統俟各省防兵全撤後再行一律檄撤似於搜

捕全局較爲周密再臣正在繕摺間據探事守

備沙生桂報稱該備於初一日經過陝省畧陽

縣見有賊匪數百人從畧陽縣屬之倒林溝竄

出初二日竄往黑河滋擾等語查黑河南通沔

縣寧羗北通徽縣虞關此股賊匪是否仍係苟

文明分股折竄入陝抑係川省另股賊匪又由

別路竄來尙未接據各州縣稟報惟無論何股

賊匪但有大批較近自應卽行趕往速剿提督

楊遇春甫於十二月初一日由兩當縣拔營前

赴虞關相距較近

臣

當卽差人飛行知會適楊

遇春營內亦有人來

臣

細加詢問據稱楊遇春

亦已探知黑河有賊現已趕往剿辦額勒登保

大營相距黑河亦不甚遠兩面夾擊此股賊匪

諒可卽就殄滅均奏入

上命軍機大臣傳諭額勒登保德楞泰曰前據德楞
泰奏報帶兵剿辦苟逆分出股匪今閱摺內所奏
情形前此苟逆西竄寧羌一帶共小股六七百人
係張添倫與陳國柱合夥餘黨並非苟逆一股分
出之賊經德楞泰沿途督剿共計殲擒賊匪四百
五六十人所辦尙好現在德楞泰就近馳赴廣元
確探苟逆蹤跡相機迎擊自應如此辦理其餘李

彬湯思蛟劉潮選及張添倫陳國柱殘匪俱應乘

勝及早殲除德楞泰派令賽冲阿温春等分投剿

辦自可得力但伊等向來隨同德楞泰帶兵剿賊

固屬奮勇今德楞泰已至廣元賽冲阿等各自領

兵無人督率或不免鬆勁德楞泰當上緊飭催尅

期辦竣不可因年節已近稍有耽延與其在軍營

度歲何如趕緊蒞事奏凱還朝同膺懋賞乎此事

辦理已閱六年被害之良民以及陣亡官弁兵勇
曷可勝計若再遲延寃憤何從伸洩成何事體朕
咎益重矣卽勒保一路亦須一體嚴催勿任遲緩
德楞秦勒保均係曾經獲咎復行加恩之人尤應
勉益加勉迅速奏功至另摺查奏苟文明股匪躡
淺過江總由七十五玩悞之咎不敢稍事回護瞻
徇實爲公正可嘉七十五專剿苟逆爲日久總

未能趕上賊匪痛剿一次其遷延遲悞早經朕看出是以屢經降旨令額勒登保德楞泰等查奏而額勒登保總未據實叅出茲據德楞泰所奏七十五不但未經與苟逆一股打仗且該逆屯聚水田坪時與七十五相距不過七八十里七十五因兵勇未會支餉回至太平縣耽延六日於二十二日始行帶兵前進迨返至南江四河壩接仗亦未得

手該逆遂西竄廣元躡淺搶渡此卽七十五確實
罪狀從前魁倫在達州耽延八日以致再添元等
從容竄過嘉陵江潼河川西地方遭其蹂躪是以
將魁倫治罪正法今當此功屆垂成之際正應趕
緊跟剿而七十五竟遲延六日與賊以暇復任苟
逆渡江裹脅又形散漫縱賊殃民罪無可逭况兵
勇糧餉稍遲亦軍營常有之事七十五惟當一面

進兵一面遣員催取或在彼紮營暫駐等候一二
日焉有轉回就餉之理乃距賊不過七八十里不
思滅此朝食竟回至太平縣城耽延六日任賊西
竄其罪甚重雖據奏續報苟文明股匪已被慶成
七十五由甘省截回折竄河東七十五緊躡賊蹤
雖似知咎而縱賊渡江之罪已屬百喙難辭本日
又據長麟奏稱七十五繞至賊前由安樂河王家

山一帶與賊接仗僅殺賊數人未能得手是長麟亦知七十五之無能其截回苟逆係慶成之功七十五仍屬無功有罪額勒登保德楞泰應卽遵前旨將七十五革職拏問秉公嚴審此時德楞泰由廣元前進自與七十五相遇卽著德楞泰先行審訊不得因已將七十五叅奏又欲心存開脫所有四川提督員缺著額勒登保德楞泰卽委軍營安

幹大員暫行署理接管七十五原帶官兵並著遵
旨於現在出力之副都統總兵內擇其打仗奮勇
而又才具明幹能膺提督之任者保舉四五員出
具考語開單進呈候朕簡放現在苟逆既出甘省
敗竄折回慶成等兩路大兵俱在賊之西北額勒
登保已由南江而入沔縣德楞泰不日可抵廣元
若慶成等將苟逆逼向東南德楞泰正可迎頭攔

截收兩面夾擊之效務當趁此機會一鼓殲擒不
可稍有稽遲又任他逸又長麟摺內稱陝省有賊
匪數百人由畧陽縣竄往黑河滋擾聞楊遇春現
往起辦且距額勒登保大營亦不甚遠等語此股
賊匪是否仍係苟文明分股折竄入陝抑係川省
另股賊匪又出別路竄來著額勒登保就近查明
具奏此等零星散竄之賊爲數無多楊遇春旣經

趕往而又與額勒登保大營相近該經畧自必督
飭剿辦無難就近掃除否則亦應逼歸川境以便
併力殲洗至所稱各路賊匪不過六七千人較前
一萬三四千之數又去其半自屬易辦但賊匪或
分或合多寡無常總須上緊剿辦絕其裹脅之路
自必日就殲除不可因目前賊數較少稍涉大意
惟當趁此大功將藏之時倍加奮勉將苟逆大股

賊匪速行辦竣並將李彬湯劉等匪一律殄平勿
留遺孽再德楞泰奏苟逆賊衆由橫梁子大灘等
處蜂擁躡淺兵勇衆寡不敵已被搶渡等語該處
既有兵勇在彼防守豈無它員率領並著額勒登
保等查明該處係何員防守據實叅奏至達勒精
阿趕殺賊匪因山高水滑墜馬跌傷仍忍痛換馬
帶兵追賊會否就愈遇便覆奏再長麟摺內有防

守陽平關遊擊徐延齡帶兵在江岸拏卡堵截因
黑夜兵單身中矛傷陣亡並著額勒登保咨部賜

卹

上又命軍機大臣傳諭長麟曰長麟奏苟文明賊匪
已竄出甘境折入四川廣元地方此時甘境已就
肅清所有甘境連界川陝地方該督現將前調防
堵秦岷一帶之官兵挑出一千六百名交鞏秦階

道等於階州邊界來往查察務須嚴密防守勿任
賊匪折回爲要其河州鎮標官兵六百名撤回本
汛以重巡防所辦亦是至黑河竄匪有楊遇春追

剿經畧亦不日趕到自無難盡數殲除該督惟當
轉飭各邊隘上緊嚴防惠齡現已馳赴新任該督
卽在甘省暫候俟惠齡到時卽面爲交代再行來

京可也

上又命軍機大臣傳諭惠齡曰前因賊匪苟文明竄入甘境特令惠齡馳驛前往辦理軍務本日據德楞泰奏報苟逆於十一月二十九日於寧羌燕子河經慶成等截剿折回慶元鍾子舖地方續又據長麟奏稱慶成於二十九日繞過陽平關迎剿苟逆卽由大灘地方竄回四川廣元境內甘省已就肅清惟探知黑河有賊匪數百人楊遇春已趕往

剿辦各等語現在額勒登保早入陝境距黑河不
遠惠齡當先往經畧軍營探明陝境賊匪業經剿
盡再行赴甘如惠齡未到之先經畧已將黑河賊
匪辦竣帶兵入川惠齡卽前往甘省與長麟面爲
交代接印任事

十一日

癸丑

額勒登保奏言查慶成於梅子園與

荷逆接仗之後該匪由崔安二壩奔逃有西竄

階州之勢慶成帶兵由白馬關郾家河往來抄
截顧住西北七十五帶兵由麻柳林任家壩探
蹤截剿顧住西南二十三日七十五進抵琵琶
寺正與賊遇副都統銜武隆阿等帶領官兵奮
力衝擊殺斃十餘人賊匪搶佔左右山梁七十
五復督率兵勇分路進攻自午至申殺賊五十
一名生擒周俸潮等四十三名兵勇傷亡數名

該匪向南折竄五馬河一帶該處路通白水之
姚家渡一帶江岸又可繞出陽平關北折入陝
七十五由魚箭壩廣平河緊顧西南江岸兜剿
慶成自郭家壩兩河口星夜帶兵由陽平關緊
顧西北進發賊匪探知兩路官兵跟追不能西
遁卽由安樂河連夜折向邵家壩逃逸二十八
日仍由陽平關下游寧廣交界之燕子河水淺

處所竄過東岸該處有遊擊徐延齡率領兵勇
二百名防剿賊匪黑夜猝至該遊擊率領兵勇

抵禦因寡衆不敵徐延齡猝中賊矛陣亡六勇

傷亡十數名因慶成官兵緊追前來賊匪不敢

停留向竹壩蔡壩河星夜南遁於初一日從鍾

子舖轉斗舖竄過棧東曾家河入廣元境

臣連

日率同扎克塔爾豐伸等由元子山沮水舖青

草驛滴水舖督師前進於初二日進抵寧羌適
慶成於陽平關緊顧西北而來據稱此次賊匪
竄入甘境祇在階州地界二百餘里之內大山
老林中往返旬餘被兩路官兵截剿緊急仍由

原路折回所有甘肅邊境寨堡早經辦竣長麟
先已飭令地方民人糧食俱皆上寨未致被其

擾害亦無畏脅等語臣於初三日抵廣元之茅

壩探報賊匪由曾家河東奔李家壩現已知會

七十五帶領官兵勇前來以便歸併一路星

速追剿前進現聞德標泰由廣元之真武宮探

蹤截擊臣更可與之合力剿辦惟臣日前由新

集沮水舖一帶進發時途次接據稟報有賊匪

四五百人由張家山古城山衝卡竄入寧羗之

卦子山二十八九等日復由錢索關竄至錢壩

有奔畧陽黑河之勢臣查楊遇春一路官兵本

由沔縣一帶進發因恐苟逆從畧陽兩當闌入

棧道遂卽帶兵由留鳳棧道一帶迎剿約計日

內可抵雲關一帶此股竄匪正可迎頭截擊臣

已飛速飭知楊遇春探蹤迎剿不致滋蔓至慶

溥辦竣南山零匪現由城固南鄭一帶而來臣

復飭令帶兵自褒城入棧兜擊以期就地掃除

其陝境西北寧汧一帶卡隘臣現令慶成仍於

寧羗八面河卦子山顧住西北一帶督率官兵

往來截擊並令永明帶兵替慶溥管理元壩子

古城山城牆岸一帶卡隘偵探截剿不任再有

踈虞再查南廣一帶零匪經官兵疊次剿殺後

該匪匿入老林臣疊經飛傳西面一帶營卡嚴

密堵剿並差弁嚴行查察茲賊匪又由張家山

古城山越卡竄入陝境實爲可恨臣連日查得

張家山卡隘係原任遊擊王自祿帶領兵丁一

百七十名防堵古城山卡隘係四川南平營都

司倭里布帶領鄉勇三百名分設防守上月二

十五日二更時賊匪四五百人從元竹坪新寨

子竄至張家山王自祿帶兵出卡奮擊賊匪一

面抵拒一面攻撲營卡該卡內留兵四五十名

不能守禦該匪衝過張家山營卡卽竄至古城

山該處都司倭里布聞信正在調集鄉勇出卡

截擊不料賊匪已於黑夜潛至卡外猛力衝過

向卦子山竄去臣查刻下各股殘匪零星肆竄

必須各處防剿官兵併力截捕方可迅速殄除

除遊擊王自祿前已疎防獲咎欽奉

諭旨革職作爲兵丁效力贖罪茲乃一悞再悞未便

稍涉寬縱應請

旨將原任遊擊王自祿卽於軍前正法都司倭里布
於賊匪竄近時未能截擊以致衝卡而過實屬
疎玩但念其所帶鄉勇分佈卡隘數處亦覺稍
單且鄉勇究不若官兵之足恃應請

旨將該都司倭里布革職發往伊犁効力贖罪恭候
命下之日卽遵照分別辦理並傳知各路防剿官兵

俾知儆戒其張家山古城山二處現今慶成監
派將備加意防堵

額勒登保又奏言查苟逆股匪本係七十五專
辦之賊乃自太平境內進剿而西已逾四十餘
日並未能痛加剿殺以致苟逆日增裹脅乘間
西趨誠如

聖諭七十五獲罪甚重臣昨於苟逆西竄時一面催

令該提督趕緊截剿一面專差官弁前往跟蹤
察探剿辦情形並札飭沿途州縣將該提督有
無逗遛遲延之處據實具稟以憑核辦因師行
無定尙未接據稟覆情形是以尙未叅

奏茲蒙

皇上訓示 已 傳

旨令其解任所有隨同 已 一路帶兵大員俱經派令

分路剿賊現祇有肅州鎮總兵豐伸一員甫由
安康調到卽令其前往七十五一路將提督印
信封固收在并營領該路兵

臣現已進抵廣

元地界七十五日內亦必到來

臣卽當面加詢

明如何逗遛遲延之處嚴行叅

奏不敢稍有徇庇均奏入

上命軍機大臣傳諭額勒登保德楞泰曰據額勒登

保奏苟文明一股經慶成等在甘省截回折竄陽平關仍入川省廣元地方與前日德楞泰長麟先後所奏相同現在額勒登保已抵廣元之茅壩地方而德楞泰亦由廣元之真武宮探蹤截剿又有慶成帶兵繞擊其七十五原帶之兵已派豐仲接管苟逆一股賊匪不過二千人有此數路大兵前後夾擊無難一鼓殲擒額勒登保等務當督率將

領奮力剿辦尅日辦盡不可再任他竄彼時李彬
湯劉等股自應一律辦竣額勒登保等應嚴飭各
路帶兵大員並咨催勒保令其認真剿辦不可稍
有遲緩至湖北邊界尙有曾芝秀戴家營股匪並
聞樊人傑亦在其內該處賊匪約計共有千餘人
全保長齡等自前月二十二日奏報後迄今尙未
續奏楚省官兵將賊匪逼剿緊急或逃入該處老

林潛匿交春後又復竄出豈不又落故套復致稽延額勒登保當於此時卽派員弁前往確探若楚省邊界賊匪俱已殲除固屬甚善否則德楞泰於苟文明一股辦竣後竟須前赴川楚交界將會戴等逆迅速殄除此時大局全定德楞泰卽可由楚省先行來京額勒登保仍在川陝適中之地暫駐督辦一切此時除苟逆大股外其餘各股零匪均

屬無多總須於年內年外將李彬湯劉曾戴等股
賊匪趕緊剿辦縱各首逆未能一時全獲必須將
賊夥大加殲戮不復成股其餘零星散竄之賊每
股祇剩數十人或百餘人合計不過千數實在敗
殘窮蹙可以歸入剿捕餘匪善後事宜內辦理方
可將戡定大局情形加緊馳奏朕卽當明降諭旨
宣示中外立沛重恩但不可稍有草率更不可再

有延緩若額勒登保等當此兵盛賊衰之際尙不思奮迅成功或延至明年二三月間始行告蕝則伊等不但不能承受恩眷轉至前功盡棄矣額勒

登保等當勉之又勉早奏膚功又據奏七十五專剿苟逆一股自太平跟追而西逾四十餘日並未能痛加剿殺其如何逗遛遲緩之處尙未查出等

語此事昨據德楞泰奏七十五於該逆屯聚水田

坪時距賊祇七八十里因兵勇未經支餉轉回至
太平耽延六日致賊衆裹脅肆竄踰淺渡河闌入
甘省此係七十五確實罪狀額勒登保尙未知悉
額勒登保俟七十五到營時卽傳旨將伊革職孛
問並將伊回至太平一節審訊明確嚴行定擬
奏若額勒登保德楞泰已會合一處自應公同審
訊如尙未會合卽著額勒登保先行審訊定擬至

七十五之子武隆阿前經勒保節次保奏加恩賞
授副都統銜雖父子罪不相及但武隆阿係在伊

父七十五一路軍營帶兵前次勒保奏武隆阿打

仗奮勇自卽係七十五轉報恐亦未必確實並著

額勒登保詳悉查明如武隆阿果能奮勉稱職前

次保奏尙屬公平則可置之不論若武隆阿不過

在伊父軍營隨同打仗並未超衆出力或可酌量

降等補用倘尙有別項劣蹟卽應叅革治罪軍營
功過難掩衆人耳目額勒登保等不可向七十五
詢問恐其瞻徇伊所帶一路將領兵弁等自有公
論無難具得底裏也至豐伸屢由軍營奏保加恩
補授總兵加提督銜但朕從未識其人現在額勒
登保雖令其管領七十五一路官兵但豐伸能否
勝任提督之處未據奏明著額勒登保德楞泰公

河酌擬如豐伸卽可勝任提督卽當奏明將該員擢授若不能勝任著遵照前旨保奏四五員候朕簡放又據奏王自祿前已踈防獲咎茲又任賊匪竄越張家山營卡未便寬縱請將王自祿卽在軍前正法一節所辦尙是但王自祿前此守卡時既有疎失彼時額勤登保若卽將王自祿革職作爲兵丁戴罪効力何至復行僨事乃仍令其防守要

隘以致又復任賊竄越一誤再誤豈非額勒登保

派委不慎之咎現當功屆垂成之際各路營卡更

當分外嚴密似此疎縱僨事之員自應按軍法從

事王自祿著卽在軍前正法示衆至都司倭里布

於賊匪竄近時未能截擊任賊衝卡而過實屬玩

悞乃額勒登保因伊所帶鄉勇分佈卡隘未免稍

單僅請將倭里布革職發往伊犁効力贖罪亦失

之姑息倭里布著於軍營枷號示衆俟大功告竣
額勒登保等凱旋時再將倭里布釋枷發往伊犁
効力至奔竄陝省黑河之賊是否係苟文明分出
之股抑係川省另股賊匪額勒登保應查明覆奏
並飭催楊遇春迅速辦竣勿留餘孽

欽定剿平三省邪匪方略正編卷二百九十

辛酉年

十二月十二日

甲寅

吳熊光奏言

臣

於前月十三

日由襄陽起程仍回房縣維時全保長齡俱督

率將弁在西南山內剿賊目下川陝賊匪業經

按股殲擒指日大功告成楚省更當趕緊剿捕

疊據探報戴家營及青藍等號餘匪經全保長

齡於老居溝八卦廟等處剿敗後向扇子壩齊

家山一帶分竄官兵趕追截擊該匪狡詐異常
一見兵至輒卽狂奔其現竄處所係房竹交界

俱屬深山老林零星雖有斬獲尚未得痛加殲

戮實爲可恨至曾王二逆係各股零匪合成一

股人數稍衆前此竄至興巴境內經孫清元吉

林泰樊雄楚李天林並分防巴東之文武四路

兜截該匪不敢東趨遂向白河口老虎埡西竄

孫清元吉林泰樊雄楚李天林等分兩路抄擊
樊雄楚等趕至天保寨該匪正在攻擾民寨見
官兵趕到卽四散奔逃兵勇直前追殺斃賊五
六十名乘閒散出者八九十名該匪亦竄入房
竹接壤之南面大山以圖延喘查賊匪畏懼兵
勇併力圍剿遁向老林深處兵至則散匿無蹤
兵退後接續四出而川楚連界一帶又多係老

林山深雪厚更易藏匿節據探報川省大寧奉
節等屬之放牛場後溪河李家壩乾溪口石牌
山黑溪河等處地方亦有零匪竄擾臣惟有與

全保長齡相機熟商董飭各鎮將等務將境內
之賊搜抽淨盡並嚴防川陝零匪毋使闖入連
日房境得有大雪未得各路剿賊信息現在業
已晴霽全保長齡等自必乘勝設法趕緊剿辦

奏入

上命軍機大臣傳諭吳熊光全保長齡曰全保長齡
自前月二十二日奏到來擊會戴各股賊匪情形
後迄今二十餘日總未見續有奏報刻深盼望茲
遞到吳熊光奏報祇係馳回房縣探報各路剿捕
情形全保長齡在房竹一帶剿辦戴家營及青藍
等號餘匪雖有斬獲並未能痛加殲戮其曾王二

逆雖經孫清元等分路抄擊殲斃五六十名散出者八九十名該匪竄入房竹接壤之南面大山辦理俱未得手據稱山深雪厚賊匪更易藏匿似該處竟與陝省南山老林相仿豈吳熊光等以此藉口竟任賊匪輾轉潛藏置之不辦安心度歲耶此時天氣嚴寒山內無糧食可掠正當趁賊匪凍餓之時上緊剿捕一鼓殲除若稽延時日轉瞬春融

賊匪又將四散奔竄擄掠得食辨理更爲棘手昨

曾諭令德楞泰於四川辦完苟逆後前赴楚省幫

剿曾戴等逆川省賊股較多此時業將辦竣湖北

境內不過零星殘匪吳熊光等若再不加奮勉迅

速剿淨必待德楞泰帶領勝兵前來因人成事豈

不赧顏吳熊光等務當趁德楞泰未到之先趕緊

於年內一律肅清不得再有稽延致干咎戾至摺

內稱大寧奉節等處現有零匪竄擾係屬川省何
股賊匪吳熊光等當督飭鎮將嚴密邊防倘賊匪
竄近楚界尤應不分畛域奮力迎擊趁勢殲除不
得以驅逼出境了事再近聞首逆樊人傑亦在楚
省邊界吳熊光摺內未經提及並著確實查明一
併擒捕勿任潛竄

十四日

丙辰

德楞泰奏言竊

臣

前抵廣元黃土坡

知苟逆等賊股由寧羗燕子河折回河東已入

四川廣元之鍾子鋪一帶

臣

卽趕緊前進嗣探

該逆由原路竄來

臣

卽改道板橋子入山迎剿

初二日兵至鍾家溝據報賊衆由會家河母家

院而來正可迎頭截剿初三日四鼓

臣

督率色

爾滾馬瑜等帶領兵勇由賀家院進發黎明抵

槽子溝賊匪已自李子園東來我兵正在溝底

競上逆衆遙見卽佔踞王家埡極高山梁頭一
層崖上各有賊衆數百人依恃陡險冰凌溜滑
抵死抗拒二層崖上之賊卽憑高擲石鎗箭並
發兵勇奮力仰攻數次未能搶上總管富登阿
帶領索倫兵五十餘名棄馬步行競上射死賊
匪十餘名帶傷者不計其數我兵卽搶上二層
崖衝入賊羣攪殺一處立斃賊匪二十餘名賊

始退上頭層崖併力抗拒荆州防禦阿卜嘗阿

射倒一賊猝被旁賊矛傷陣亡時王家燈山頂

之賊見官兵已上二層崖一齊下壓勢極兇猛

馬瑜等帶領兵勇由左邊迎剿色爾滾等帶領

索倫官兵步行由右邊旁抄兩路鎗箭如雨臣

催令競進賊見官兵勢猛不敢再壓賊恃地險

冰滑力拒不退守備陳應彪首先搶上受傷陣

亡臣見王家埡山勢險峻冰雪凝滑兩旁均係

陡坎無路可繞惟左邊樹木叢雜若鑽林越箐

扒上數人可以直至頭層崖之後臣卽令吉林

藍翎領催巴圖爾前鋒德齡披甲德林保惠德

四人各帶鳥鎗短衣結束攀藤附葛繞至頭層

崖側藏於山凹臣親見連次鎗斃賊匪十七名

賊匪始行慌亂右一路色爾滾帶領侍衛蘇爾

伸總管富登阿蘇卿阿副總管珠山佐領達什
左一路馬瑜帶領副將達自祥叅將張應貴馬
濟遊擊馬文斌涂陞中一路副將李應貴馬應
國叅將何君佐遊擊李應元守備龍必達一齊
趁勢上搶王家堽賊衆又復下壓與我兵攪殺
一處短兵相接立殺賊匪四十餘名索倫監翎
披甲克星額受傷陣亡時山後又有賊來接應

臣

卽在二層崖上用礮轟擊兵勇無不憤恨鎗
箭刀子一齊舉發又殺賊二十餘名受傷賊匪
百餘名生擒十八名賊方敗走我兵搶佔山頂

臣

復督同將弁兵勇趕追二十餘里沿途殺賊
三十餘名生擒十一名直至黑山老林時已天
晚卽有該處硃民陳有才飛奔馬前稟稱賊匪
男婦小口先已走張壩去了今有許多戰手埋

伏在老林內兩邊我在柵子看見真確等語

臣

復令哨探無異隨賞給陳有才大銀牌一面查

黑山形勢係直脊一道山梁林深箐密水堅雪

凝暮夜深林實爲徒勞無濟我兵卽於王家壩

屯駐

臣

查苟文明等賊股男婦大小現在約有

三千餘人馬騾四五百頭匹各逆衣帽整齊者

實多其中亦有烏鎗弓箭撒袋殊堪詫異而其

兇悍情形尤爲可惡該逆素爲狡猾茲又糾合
張士龍餘黨及各股老賊遺孽均係敗殘亡命
之徒當此功屆垂成萬不可令其稍占便宜

臣

已諭令各營將領等每逢剿殺時進退務當留
意斷不可以輕視隨訊活賊謝美觀等供稱苟
文明與藍號張士龍餘黨合夥又在通江南江
一帶遇見各股打散之數百人亦來併合前過

廣元李家壩地方又偷破大寨一處擄有七八

百人得衣服鎗箭什物頗多今回廣元要到蒼

溪過江現有大兵緊追恐不敢前去營裏連婦

女小口有三千餘人騾馬幾百匹今日帶傷者

有二百餘人聽元帥等說白蓮教劫數已完遲

早總是一死等語餘無要供當將謝美觀等三

十九名一槩正法又查蒼溪閬中一帶嘉陵大

江現在冬令水涸灘淺而臣帶兵緊躡趕剿賊

匪萬難搶過然亦不可不爲嚴防現已飛飭總

兵許文謨川北道李鉉副將王威寧知府德福

等將上游白水一帶防兵酌量抽撥添設於蒼

閬沿江各卡日夜嚴密防堵後有追兵使賊腹

背受敵斷不敢直前搶渡旋探苟逆是日屯紮

張壩有出大石板元壩于之勢臣於初四日趕

至李子坪沿途逃出陝甘難民譚廷禮等十七

名該逆於二更拔營由元壩子出大路向東南

至真武官約行一百四五十里初五日臣趕抵

尖山場沿途又有逃出陝甘難民李先福李周

氏等二十七名口相距賊匪六十餘里該逆探

知官兵已到又於二更時竄往蒼廣南二交界

之三灘寺初六日臣趕至旺蒼壩又有逃出難

民陳殿魁王陸氏等三十一名口臣俱已訊明

給票就近護送廣元縣令其按名遞送各原籍

安爲安插此次陣亡官二員兵二名受鎗矛箭

石傷者滿漢官弁十一員各兵勇六十餘名均

不甚重現俱隨營征勦容俟查明另行咨部隨

接據總兵田朝貴稟報前准臣飛札飭知接勦

張添倫及楊開甲餘匪當卽帶兵跟蹤進發初

二日黎明行至平梁溝時值賊匪起營田朝貴
派令叅將張明德守備鍾廷孝等帶領兵勇由
左手翻火焰寨向關門子追剿沿途殺賊五十
餘名生擒賊六十餘名令遊擊王忠桂和欽等
由右手苗家山神壇溪一帶追剿殺賊八十餘
名生擒三十餘名田朝貴督率叅將李芝榮都
司馬見廷守備劉金元等由中路土門子太平

坡等處趕剿殺賊六十餘名擒賊一百十餘名
奪獲長矛旗幟六十餘件驟馬四十八匹三路
獲犯共計二百二十四名內訊出僞先鋒秦念
台探馬頭吳俸陞王先並旗手三名及老戰手
王子朝等一百二十六名立即正法其新擄難
民鮑順福邢陸氏等九十二名口交地方官按
名分別給票照例妥爲遞送回籍訊據秦念台

等供稱元帥原是張添倫並楊開甲手下總兵
陳國柱二人二十八日在白坪堰合上魏元帥
閻元帥三百餘人今共有六七百人餘無要供
殘匪已向關路口奔逃仍卽帶兵追剿等情

臣

當卽批飭令其趕緊追剿務期迅卽擒掃再

臣

疊奉

諭旨飭令將提督七十五革職拿問及查明沿河踪

防文武臣前摺已將七十五剿辦不力並文武

踈防另行查辦奏明茲苟逆業已截剿回川而
經畧額勒登保聞於初四日趕至李家壩雙河
口正值七十五在彼已傳

旨革職拿問並將所帶將弁兵勇委員接管督率東
來約計兩三日內又可與臣會合一俟到來安

爲熟籌將苟逆等股賊匪先行趕緊剪除以冀

迅速蕲事其七十五並河防疎虞文武請俟會
合後查明另行會銜具奏奏入

上命軍機大臣傳諭額勒登保德楞泰曰前此各股
賊匪經官兵疊次勦殺勢極殘敗不敢與官兵接
仗馬騾皆少衣服凋零惟到處逃避苟延殘喘今
苟文明一股糾合張士龍餘黨及各股老賊遺孽
大小男婦約有三千餘人馬騾四五百頭匹衣帽

集三才身之學新卷三身
三
整齊并有烏鎗弓箭撒袋等物德楞泰所帶俱係
屢次得勝勁旅極爲趨健素爲賊匪所畏懼乃此
次苟文明等匪竟敢搶佔山梁併力抗拒並兩次
下壓勢極兇悍官兵僅殲賊一百餘名未能得手
實爲可恨總由七十五在太平耽延時日子賊以
暇致苟逆在李家壩地方攻破大寨擄掠七八百
人並衣服鎗箭等物其寨中百姓遭賊慘殺者更

不知凡幾此皆七十五縱賊殃民之罪據稱額勒
登保於初四日趕至雙河口已將七十五革職拿
問德楞泰於兩三日內卽可與額勒登保會合伊
二人當遵照節降諭旨嚴審定擬具奏此時大股
兇悍賊匪祇有苟文明一股額勒登保德楞泰務
當督率將弁等併力合擊以期滅此朝食斷不可
稍有鬆懈若能將苟文明一股趁勢殲盡則其餘

零星散竄之賊無難搜捕淨盡惟望額勒登保德

楞泰於年內年外遞到戡定大局捷音同膺懋賞

况據獲賊供內有白蓮教劫數已完遲早總是一

死之語額勒登保等當乘此出示曉諭以該首逆

等自知白蓮教劫數已完萬無生理當此大兵雲

集勢如拉朽摧枯立成灰燼其首夥各逆稔惡已

久斷難幸免誅夷而爾等被脅之人本係良民不

得已而從賊今當教匪氣數已盡之時何苦甘心
附從同罹慘戮不如及早投出既可免遭鋒鏑又
得官爲授產給資各安生計禍福生死所關爾等
亟宜省悟如此愷切曉諭俾裹脅難民及早投出
不但散其黨與而投出一賊卽可少殺一人其始
終怙惡之賊總應悉數殲擒毋令漏網所有此次
打仗首先帶領索倫兵棄馬步行射死賊匪十餘

名之總管富登阿可嘉之至著以應陞之缺陞用
藍翎領催巴圖爾前鋒德齡披甲德林保惠德四
人取道繞上層崖鎗斃賊匪多人亦屬奮勉著德
楞泰存記遇有該員等應陞缺出卽行保奏嗣民
陳有才赴營稟報賊匪埋伏老林德楞泰復令哨
探無異未中賊計卽屬陳有才之功除已賞銀牌
外並著德楞泰查明再行加恩賞給陳有才八品

頂戴若原有頂戴卽加一等賞給以示獎勵守備
陳應彪於賊匪恃險力拒首先搶上受傷陣亡甚
屬可惜著加等照都司陣亡例賜卹防禦阿卜當
阿藍翎披甲克星額亦俱殺賊陣亡均著咨部賜
卹再前次德楞泰札調總兵田朝貴帶兵二千名
剿辦張添倫陳國柱等股茲田朝貴接准德楞泰
飭知後卽帶兵趕往將張添倫等股痛加剿捕獲

有勝仗共殲斃匪二百餘名德楞泰務當轉飭該
鎮乘勝將此股迅速殄除勿留餘孽至勒保一路
於本月初四日陳奏軍營情形此時已隔旬餘未
據續有奏報德楞泰亦須一體嚴催毋任延緩其
由畧陽竄近黑河之賊是否卽係苟文明分股折
竄抑係川省另股賊匪曾經降旨諭令額勒登保
就近查明此時楊遇春率領將弁在彼專剿如已

辦有就緒額勒登保得信後並著卽行馳奏

十七日

臣未

勒保奏言竊

臣

與額勒登保德楞泰

分兵後

臣

轉回川東飭催薛大到將城口賊股

趕緊剿辦又因雲萬一帶報有零匪派令總兵

張志林督同唐際盛夏雲龍等帶兵先行前往

探剿

臣

路過達州卽就近將各路糧餉籌備并

審辦各要案仍一面遴派弁兵分探各路賊蹤

探得薛大烈一路官兵自將黃號餘黨剿辦後
卽帶兵由木坪河渡口場等處搜剿山中餘匪
聞菜子壩一帶有湯逆竄匿蹤迹薛大烈隨卽
帶領兵勇探蹤前進適格布舍楊芳追剿李逆
帶兵前來亦因李逆輾轉窮竄尙未就擒該鎮
等會商設法剿辦現由修溪壩取道分投進兵
兜擊又探得賽沖阿溫春一路官兵跟追劉逆

至火燒包地方剗逆所帶二百餘人遁走茶山
壩又合黃號餘黨百餘人折圍團城又有不知
姓名殘匪五六十人湊竄老林經賽沖阿帶兵
轟出該匪復向沙陀子由茅坪龍洞河唐家坪
一帶東竄有奔赴大寧奉節之勢賽沖阿等現
在緊躡追剿查以上各股賊匪均不過二三百
人輾轉奔走忽分忽合首逆究在何股一時頗

難探確惟有分兵四路搜捕逢賊卽剿庶幾賊

勢日減而兵力不致徒勞臣現在分投寄信賽

冲阿温春格布舍楊芳薛大烈等務須彼此趁

勢聯絡賊分卽分賊合卽合但能日有斬獲自

可使賊匪日就殲除至苟文明一股竄至川北

與他股餘匪零星湊合人數稍多近日向西北

窮竄因官兵在後追剿該匪復分爲兩股一股

上竄陽平關一股下竄蒼溪其竄陽平關之賊

又由陝折回在朝天關以上之金獅廟地方踞

淺渡河竄入甘省階州一帶慶成七十五兩路

官兵分投兜截聞已得有勝仗且額勒登保親

往督剿諒可不致蔓延其竄蒼溪之賊亦至堰

溪口之嘉陵江岸砍取竹木紮筏希圖搶渡經

該處防江文武極力擊退此時德楞泰已帶兵

前往剿辦亦可無虞惟查此時竄走階州一帶之賊若再折向西南卽逼近白水江其上游西岸係屬番地路通龍安下游西岸卽昭化一帶

臣現已飛飭松潘鎮總兵呂朝龍嚴防白水江

上游建昌鎮總兵許文謨嚴防白水江下游務

使賊匪不能偷渡川西庶經畧叅贊兩路大兵

易於得手臣現將達州應辦各案審明具奏後

卽向雲陽大寧一帶淮發以便督同各路官兵
搜剿餘孽以清東路再據開縣知縣馬鳴鑾稟
報盤獲賊匪鮮明思一名臣提犯親鞫供係鮮

大川胞姪與鮮大川一同習教起事向在賊夥
充當總兵管帶一千餘人在川陝楚三省歷次
與官兵打仗鮮大川死後該犯帶衆逃入苟文
明股內本年秋間在開縣地方被七十五一路

官兵剿散該匪子身窮竄被開縣差役盤獲

臣

於審明後當將該犯臠割示衆至開縣知縣馬
鳴鑾留心盤詰尙屬能事其盤獲該逆之差役

臣

現已酌加獎賞以示鼓勵

臣

正在拜摺間接

據川北道李鉉稟報苟文明股匪於十一月二
十八日由寧廣交界之燕子河地方仍竄回河
東有七十五在後帶兵追剿等語是該匪業已

折回東岸不致蔓延甘省且聞額勒登保已帶
兵由沔縣兜截叅贊德楞泰已帶兵向廣元迎
擊諒可卽就殲除奏入

上命軍機大臣傳諭勒保曰勒保自本月初四日奏
到分剿李彬湯劉等股賊匪情形後迄今已將半
月總未見續有奏報本日遞到奏摺僅係探報蹇
冲阿薛大烈等分路剿賊情形而勒保轉在達州

審辦案件耽延多日此次拜摺後始向雲陽大寧

一帶進發殊屬遲緩現在川省剿辦零星股匪爲

第一要事何勒保轉視爲無足重輕僅委之賽冲

阿薛大烈等分投剿辦勒保藉審案爲名安坐達

州度歲全不以辦賊爲事實不可解至摺內稱會

商設法剿辦之語亦係紙上空談並未見伊等打

仗得手豈不又成軍營奏報故套耶賽冲阿温春

等帶兵雖素屬奮勇但已離德楞秦軍營獨自領

兵無人督率恐不勉鬆勁勒保卽不親臨前敵亦

應前往督率豈有置之不問之理看來伊等因年

節已近竟欲安心度歲不思滅此朝食往年賊股

較多之時伊等每逢年節卽不免心存懈弛此時

川東一帶不過敗殘餘匪勒保等尤易涉大意殊

不思上年正月初一日額勒登保由川省起程赴

陝將剿賊之事委之魁倫而魁倫竟在達州安住
八日以致冉添元等乘間搶渡嘉陵江川西地方
被賊蹂躪魁倫遂因此伏法前鑒不遠勒保亦係
棄瑕錄用之人可不引以爲戒乎當此功屆垂成
尤爲刻不可緩豈得因度歲致有耽延勒保固不
可稍存此念並當通飭川省各路軍營併力同心
上緊剿賊將李彬湯劉各股鼠匪趁此隆冬掃除

淨盡伊等與其在軍營度歲何如奏凱還朝同膺

懋賞乎至苟文明大股之賊現已有額勒登保德

楞泰兩路大兵在廣元一帶前後夾擊定可尅期

殄除無須勒保分心兼顧所有川東零匪專交該

督率同賽冲阿薛大烈等卽在雲陽大寧一帶就

地殲盡若稍有遲緩至來歲春融賊匪又得掠食

飽颺四散奔竄或又闖入楚省惟勒保是問前曾

撥兩淮鹽課銀二十萬兩解川應用現又降旨諭
令書魯將兩淮商捐項下撥給銀二十萬兩解交
楊揆備用該省軍需更爲充裕然不可因充裕稍
涉冒濫仍須實力撙節也

同日

上命軍機大臣傳諭書魯曰現在大功卽日告竣川
省一切善後事宜需費較多著書魯於兩淮商捐

項下撥銀二十萬兩派委妥員迅速解往川省交
楊揆收貯備用並飭沿途各州縣小心護送毋得
稍有遲緩疎虞

十八日庚申長麟奏言查黑河小股賊匪探知楊

遇春追趕緊急卽晝夜狂奔於初七日夜半由
陳倉溝竄出南星棧道奔入鳳縣迤東之王家
場楊遇春連夜追來鍋帳兵勇悉行落後僅有

奮勇兵勇數百人於王家場趕上賊蹤賊匪正在喘息楊遇春鼓勵兵勇一擁直前賊匪驚惶四散楊遇春分兵搜捕殺賊一百餘人生擒六十六名賊匪僅有騾馬二十餘匹亦經全數奪獲訊據活賊供稱首逆係辛聰劉永受在逃未獲連夜竄至鳳縣東南之銀門寺楊遇春齊集兵勇鍋帳卽分兵兩路一路由銀門寺追剿一

路遠由鳳縣正東之大樹壩抄截計此時副都

統慶溥諒已趕抵馬迥留壩一帶正可迎頭截

剿與楊遇春前後夾擊臣當將賊匪趨向及楊

遇春分兵抄截路徑飛速詳細寄知慶溥俾有

把握以便相機進兵臣於十二日

接據興安府屬之署漢陰廳通判杜蕙稟報賊

匪一股約五六百人於初四日夜間竄過江北

其確由何處偷渡稟內未據聲明除飛飭查明

該匪偷渡處所並防江大員職名報明經畧叅

奏外臣亦已飛檄署陝安鎮總兵百祥署寧陝

鎮總兵韓自旦寧陝鎮都司黃瑞各帶兵勇迅

速迎往截剿至辛聰賊匪不過剩有三百餘人

現有楊遇春慶溥兩路兵勇實已足敷剿辦臣

亦已飛行札商楊遇春如辛聰賊匪無需通判

雒昂兵力亦卽飛飭雒昂帶領鄉勇趕往漢陰

一帶協剿渡江賊匪更爲得力再臣接據額勒

登保來信內稱偵探苟逆賊匪已由陝省之陽

平關折回由原路竄入四川廣元縣屬之李子

壩等處額勒登保卽自黃壩驛改道入川顧住

陝境趕緊追剿已於十二月初四日起至廣元

縣屬之劉家坪相距賊蹤不遠叅贊德楞泰現

在亦已趕抵廣元縣屬之賀家院一帶相距賊
蹤亦不甚遠日內必有勝仗提督慶成現已帶
兵回陝仍赴防所奏入

上命軍機大臣傳諭長麟陸有仁曰朕初閱長麟奏
報所叙情形楊遇春將辛聰劉永受等趕緊追剿
分兵搜捕殲擒一百六十餘名賊匪敗竄鳳縣東
南一帶楊遇春分兵兩路抄截而慶溥亦抵馬道

留壩一帶迎頭截剿定可迅速殲除稍慰懸厯及

閱至接據漢陰通判稟報有賊匪一股約五六百人於初四日夜間竄過江北又致蔓延實爲可恨前此漢江北岸竄匪經官兵搜捕多日始能肅清茲又任賊匪闌入實屬不成事體自係防江員弁疎玩所致卽著長麟查明此股賊匪是何姓名係何處竄匪從何處汎地偷渡防守大員係屬何人

卽行據實叅奏漢陰地方與平利紫陽相近該匪
或由楚省邊界竄來亦未可定長麟祇須將此股
首逆姓名詢出卽可知其何處竄來現在辛聰等
殘匪祇餘二三百人有楊遇春慶溥二人足敷剿
辦長麟已飛檄百祥韓自昌等各帶兵勇前往漢
陰截擊並札商楊遇春令通判雒昂帶領鄉勇趕
赴該處協剿所見甚是雒昂向在南山一帶剿捕

餘匪路徑最爲熟悉卽速飭該員前往協剿可期

得力計此旨到時如楊遇春慶浦已將辛聰等殘

匪辦竣伊二人卽同赴漢陰會剿若餘匪一時未

淨或專交楊遇春督率搜捕慶浦卽分兵往剿偷

渡漢陰之賊慶成現已帶兵回陝長麟尙係該省

總督俱應迅速趕往會同剿辦並嚴飭派往之署

總兵百祥韓自昌等奮力截擊必須將渡江之賊

悉數殲擒否則亦必逼回南岸斷不可令其前竄
或致逸入南山老林况五郎地方已設有重鎮南
山一帶各隘口俱添設將弁兵丁專司防堵聲勢
聯絡亦萬無令賊匪竄匿之理陸有仁現駐漢中
自己早得地方官稟報並著該撫隨時確探渡江
賊匪情形如官兵得有勝仗卽速馳奏以慰塵注